



# KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

---

## *SKINA DI INVERSHONISTA*

---

Publikashon 5. 2019

### Kapital ku pasenshi

“Hasimentu di invershon mester ta mas manera wak fèrf seka òf wak yerba krese.  
Si bo ke eksitashon kue \$ 800 i bai Las Vegas.”

*Paul Samuelson*

Ora bo ta invertiendo bo sèn ku bo a gana ku hopi esfuerso, kon lihé bo ta pensa ku bo mester kuminsá mira e rendimentunan montonando riba bo invershon original? E siguiente dia? Dentro di un siman? Un par di luna despues? Un año, dos año?

Pa mayoria, un di e preguntanan primario ku bo tin ta drei rònt den bo kabes ora ta hasi invershon, ta “Kon lihé ta muchu lihé òf muchu lat, loke ta trata esei, pa bo por mira e rendimentunan bunita montonando den bo kuenta di invershon? Bo sa tòg, e rendimentunan ku ta sostené i hustifiká e henter idea di hasi invershon den algu i pone bo sèn traha pa bo?”

E reto serka mayoria invershonista, spesialmente prinsipiantenan, ta ku ora nan invertí, nan ke wòrdu rekompensá pa e invershonnan AWOR! Hopi biaha no tin pasenshi den e wega, niun oportunitat ta wòrdu duná na bo invershon pa laga bo sèn traha pa asina e por realmente generá

e rikesa ku e ta asina kapas di hasi ku tempu. I realmente, ora bo pens'é, di kon lo bo no ta impasiente? Di kon lo bo no ke wòrdu rekompensá AWOR en bes di mas despues! Pues, realmente mi no ta kulpa e manera di pensa aki di “al instante” ètòl. Al fin i al kabo ta un kos hopi humano: nos tin tantu gana di mira un kresementu den nos portafolio. En realidat nos ta asina tristu si nos no mira moveshon den nos kuentanan òf mas pió, si tin un bahada den nos portafolio durante un periodo di tempu.

Loke mi ta sigui kompartí ku invershonistanan – kendenan krusa mi kaminda puntrando pa konseho – ta ku e merkado semper ta pasa dor di un siklo. Esaki ke mèn ku semper lo tin subida ku lo wòrdu sigui pa bahada ku despues lo wòrdu sigui pa subida. I e siklo ta sigui i sigui. Pues si un merkado ta eksperensiendo un bahada, mi por garantisá bo ku e merkado lo inevitablemente eksperensia un kantidat di bon aña den futuro. Ta solamente un kestion di ki ora! Naturalmente, por tin algun invershon ku kisas lo no rekuperá i si esei ta e kaso, e ora ei sigur e puntonan fundamental di e kompania lo ta malu irespekto si e ekonomia ta pasando dor di un reseshon òf ta gosando di kresementu ekonómiko.

Kiko mi ta tratando di logra aki? Invertimentu den akshon ku ta basá riba kreashon di rikesa i rekompensa riba plaso largu ta estrechamente konektá ku e konsepto di *kapital ku pasenshi*. Kiko mi ke mèn ku esei? Sigun Wikipedia, ku kapital ku pasenshi un invershonista ta dispuesto di hasi un invershon finansiero den un kompania (meskos ku kumpramentu di akshon) sin niun speranza di hasi un ganashi lihé. En bes di esei, e invershonista ta dispuesto di laga un rendimentu inmediato pasa anticipando rendimentunan mas substansial mas despues. Pues manera e nòmber ta sugerí, kapital ku pasenshi ta rekerí pasenshi, no solamente di e invershonista pero tambe di esun ku ta risibí e invershon mes. Laga nos wak esaki for di dos perspektiva separá, 1) komo un empresario buskando finansiamentu pa finansiá un proyekto òf un kompania i tambe 2) komo un invershonista tumando desishonnan di invershon pa krea rikesa.

Pa esun promé, ora ta trata di rekoudá fondo pa un proyekto, normalmente tin dos manera prinsipal pa logra esaki. Sea dor i un fianza òf un emishon di bono, kaminda bo ta risibí e suma prinsipal i ta wòrdu ferwagt di bo ku bo ta paga e suma prinsipal aki bèk huntu ku un òf otro suma na interes. Esaki ta manera e areglo di fianza típiko di un banko komersial i emishon di bono di kompania. Òf, dor di un opshon di finansiamentu den kua bo ta rekoudá fondo dor di invershonnan den akshon riba e bolsa di balor – den otro palabra kapital ku pasenshi.

Bou di e areglo di fianza ku laga nos bisa un banko, esun ku ta fia normalmente lo wòrdu obligá di paga e montante di e fianza kuminsando inmediatamente, hopi biaha hasta promé ku e proyekto òf kompania realmente ta kapas di hasi e pagonan aki. Bo por komprondé awor di kon, mayoria empresario buskando un manera pa rekoudá kapital lo por preferá “un invershon di kapital ku pasenshi” komo ku nan no mester wòri di hasi pagonan di fianza mensual, spesialmente den e partinan tempran di e proyekto – e segmento di lansamentu ora lo tuma un kantidat di tempu pa e negoshi kuminsá kana. Ku kapital ku pasenshi, e empresario por enfoká riba solamente operashon di e núkleo di su negoshi pa kresementu futuro.

Basá riba esaki, komo un invershonista buskando kreashon di rikesa, ta bale la pena pa tin pasenshi den bo espektativanan i pa tin un horizonte di tempu di plaso largu pa por realmente benefisiá di e konsepto di tin bo sèn trahando pa bo. Esaki ta pasobra kapital ku pasenshi tin mester di tempu pa generá e rendimentu!

Sigui Skina di Invershonista pa tur kos ku bo mester sa tokante Kreashon di Rikesa!

**E editorial aki a wòrdu presentá na bo pa DCSX ku kolaborashon di Vertex Investments.**

**Outor di e publikashon aki: Stephanie Shaw CFA, MBA.**

